



SURUHANJAYA PILIHAN RAYA MALAYSIA  
**KENYATAAN MEDIA**

**Bil. 16 / 2024**

**URUSAN PILIHAN RAYA KECIL  
DEWAN UNDANGAN N.20 SUNGAI BAKAP, PULAU  
PINANG**

1. Suruhanjaya Pilihan Raya Malaysia (SPR) telah menerima pemakluman rasmi daripada **YB Dato' Law Choo Kiang, Speaker Dewan Undangan Negeri Pulau Pinang**, berhubung dengan kekosongan luar jangka kerusi **Dewan Undangan N.20 Sungai Bakap, Pulau Pinang**.
2. Sehubungan itu, SPR telah mengadakan Mesyuarat Khas pada hari ini, **6 Jun 2024 (Khamis)** dan memutuskan satu **Pilihan Raya Kecil (PRK) Dewan Undangan N.20 Sungai Bakap, Pulau Pinang** hendaklah diadakan bagi mengisi kekosongan kerusi tersebut.
3. Bagi maksud menjalankan PRK Dewan Undangan N.20 Sungai Bakap, Pulau Pinang, SPR telah menetapkan tarikh-tarikh penting seperti berikut:

<b>Tarikh Writ</b>	<b>:</b>	<b>6 Jun 2024 (Khamis)</b>
<b>Hari Penamaan Calon</b>	<b>:</b>	<b>22 Jun 2024 (Sabtu)</b>
<b>Hari Undi Awal</b>	<b>:</b>	<b>2 Julai 2024 (Selasa)</b>
<b>Hari Mengundi</b>	<b>:</b>	<b>6 Julai 2024 (Sabtu)</b>

4. Tempoh berkempen ditetapkan **14 hari** bermula selepas pengisytiharan calon-calon yang bertanding pada **22 Jun 2024 (Sabtu)** sehingga pukul **11.59 malam, 5 Julai 2024 (Jumaat)**.
5. Urusan permohonan semua kategori undi pos luar negara dan dalam negara bagi PRK Dewan Undangan N.20 Sungai Bakap, Pulau Pinang dibuka bermula dari hari ini, **6 Jun 2024 (Khamis)**. Manakala tarikh tutup permohonan adalah seperti berikut:

<b>Bil.</b>	<b>Kategori</b>	<b>Tarikh Tutup</b>
1	<b>1A</b> (Petugas Pilihan Raya, Ahli/Pegawai SPR, Anggota Polis, Anggota Tentera, dan Petugas Media)	<b>20 Jun 2024 (Khamis)</b>
2	<b>1B</b> (warganegara Malaysia yang berada di luar negara)	<b>13 Jun 2024 (Khamis)</b>
3	<b>1C</b> (Agensi / Organisasi)	<b>13 Jun 2024 (Khamis)</b>

6. **Permohonan undi pos adalah secara dalam talian (online)**. Maklumat lanjut dan panduan permohonan undi pos boleh dirujuk melalui **Portal SPR, [www.spr.gov.my](http://www.spr.gov.my)**.
7. Bagi menjalankan proses PRK Dewan Undangan N.20 Sungai Bakap, Pulau Pinang, SPR telah melantik **seorang (1) Pegawai Pengurus Pilihan Raya** dibantu oleh **tiga (3) orang Penolong Pegawai Pengurus**. Manakala bagi tujuan memantau aktiviti kempen pilihan raya sepanjang tempoh rasmi berkempen, SPR akan menubuhkan **dua (2) Pasukan Penguat Kuasa Kempen**

**Pilihan Raya (PP-KPR)** yang turut dianggotai oleh wakil-wakil daripada pihak Polis Diraja Malaysia (PDRM), Pihak Berkuasa Tempatan (PBT) dan wakil-wakil calon yang bertanding.

8. Bagi maksud PRK Dewan Undangan N.20 Sungai Bakap, Pulau Pinang, **Pusat Penamaan Calon (PPC)** dan **Pusat Penjumlahan Rasmi Undi (PPRU)** yang digunakan adalah di **Dewan Serbaguna Jawi, Jalan Serindit, Taman Desa Jawi, Pulau Pinang**.
9. Seramai **552 orang petugas** akan dilantik bagi mengendalikan proses PRK Dewan Undangan N.20 Sungai Bakap, Pulau Pinang. Manakala, sebanyak **9 buah pusat mengundi biasa** yang mengandungi **65 tempat mengundi/saluran dan satu (1) pusat mengundi awal yang mengandungi satu (1) tempat mengundi/saluran awal** akan digunakan. Keseluruhan jumlah pusat mengundi adalah sebanyak **10 buah dengan 66 tempat mengundi/saluran**. PRK Dewan Undangan N.20 Sungai Bakap, Pulau Pinang memerlukan peruntukan sebanyak **RM2.1 juta**.
10. Daftar Pemilih Pilihan Raya (DPPR) yang akan digunakan untuk PRK Dewan Undangan N.20 Sungai Bakap, Pulau Pinang adalah **daftar pemilih terkini sehingga Daftar Pemilih Tambahan Bulan April 2024 yang dikemaskini sehingga 24 Mei 2024**. DPPR ini mengandungi seramai **39,279 orang pemilih yang terdiri daripada 39,222 orang pengundi biasa dan 57 orang anggota Polis**. DPPR bagi PRK Dewan Undangan N.20 Sungai Bakap, Pulau Pinang akan mula dijual pada **18 Jun 2024 (Selasa)**.

11. Para pengundi boleh membuat **semakan maklumat** pengundian untuk mengetahui maklumat **pusat mengundi, saluran mengundi dan nombor bilangan** mereka melalui portal semakan di pautan **<https://mysprsemak.spr.gov.my>** atau hubungi **Hotline SPR di talian 03-8892 7218** atau melalui **aplikasi MySPR Semak**. Semakan maklumat pengundian akan **dibuka pada 18 Jun 2024 (Selasa)**.
12. Untuk memudahkan proses penamaan calon, SPR menyeru kepada bakal-bakal calon yang ingin bertanding dalam PRK Dewan Undangan N.20 Sungai Bakap, Pulau Pinang, agar mengisi dan membuat semakan awal pengisian borang tersebut dengan Pejabat Pegawai Pengurus atau Pejabat Pilihan Raya Negeri Pulau Pinang sebelum Hari Penamaan Calon. Selain itu, bakal-bakal calon juga adalah digalakkan untuk membuat pembayaran deposit lebih awal. Ini bertujuan untuk memastikan semua proses penamaan calon dapat diselesaikan lebih awal dan berjalan lancar.
13. Walau bagaimanapun, adalah diingatkan bahawa Kertas Penamaan Calon yang telah lengkap diisi dan disemak oleh Pejabat Pegawai Pengurus itu hendaklah dikemukakan oleh calon atau penyokong atau pencadangnya semasa Hari Penamaan Calon di PPC yang telah ditetapkan oleh SPR.
14. Pada PRK ini juga, SPR turut menawarkan kepada **mana-mana agensi Kerajaan, Pertubuhan Bukan Kerajaan (NGO) atau badan yang berminat** untuk menjadi **pemerhati pilihan raya** dalam melihat perjalanan **proses PRK** ini bermula dari **hari penamaan calon sehingga keputusan pilihan raya**

**diumumkan.** Mereka dibenarkan untuk membuat pemerhatian seperti **di pusat penamaan calon, pusat mengundi, tempat pengiraan undi dan pusat penjumlahan rasmi undi** serta perlu mematuhi kesemua syarat-syarat pelantikan yang telah ditetapkan.

15. **Maklumat lanjut dan borang permohonan** untuk pemerhati boleh diperolehi daripada **Portal SPR [www.spr.gov.my](http://www.spr.gov.my) mulai hari ini, 6 Jun 2024 (Khamis) dan tarikh tutup permohonan pada 13 Jun 2024 (Khamis).**
16. SPR akan meneruskan penyiaran secara langsung proses-proses pilihan raya menerusi *live streaming* bagi Pusat/Saluran Mengundi yang terpilih di laman *Facebook* SPR sebagaimana yang dilaksanakan pada pilihan raya sebelum ini.
17. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen `**Jom Kita Undi**` melalui pelbagai saluran media termasuk di media elektronik, media sosial, hebahan melalui siar raya dan pemasangan kain rentang di lokasi-lokasi strategik tumpuan awam dan tempat-tempat lain yang bersesuaian.

Sekian dan terima kasih.

**DR. AZMI SHAROM**

**Timbalan Pengerusi**

Suruhanjaya Pilihan Raya Malaysia

6 Jun 2024 / 28 Zulkaedah 1445H